



ATASSUT

UPA14/154-1

Gerhardt Petersen

29.04.2014

Naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitsisinnaaneq pillugu UKA2014-imut nassuiaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiisassallutik kiisalu aatsitassarsiornermi pilersaarutit ataasiakkaat siunissaq ungasinnerusoq eqqarsaatigalugu piujuartitsineq tunngavigalugu inuiaqatigiinni ineriartortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalakkersuisunut innuttaasunullu inassuteqaasiortassapput. Siunnersuisoqatigiit katitigaanerat, akissarsiaat pisinnaatitaanerilu pillugit ilutsit periarfissaasinnaasut nassuiaammi ilanngullugit nalilersorneqassapput.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqatigiit)

Inuit Ataqatigiit sinnerlugit Inatsisartuni ilaasortat Naaja H. Nathanielsen aamma Sara Olsvig, matumani siunnersuuteqarput arlaannaannulluunniit attuumassuteqanngitsunik siunnersuisooqatigiinnik pilersitsisinnaaneq pillugu UKA 2014-mi saqqummiunneqartussamik nassuiaasiussasut.

Siunnersuuteqartut matumani pingaartumik siunertaraat siunnersuisoqatigiit pilersinneqassagunik aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassasut.

ATASSUT-mit pingaartilluinnarparput pingaartumik aatsitassarsiornermut tunngatillugu aalajangiisarnerit qaffasissumik pitsaassuseqarnissaat aammalu aalajangiiniarnerni kukkussutaasinnaasut pinngitsoortinniarlugit siunnersorneqarneq pitsaanerpaatinneqassasoq.



ATASSUT INATSIARTUNI

Taamaammanuna ATASSUT-mit kissaatigigipput aatsitassarsiornermut tunngatillugu siunnersorneqarnerup qaffasissumik pitsaassuseqarnissaa aammalu aalaakkaasuunissaa siunnersuisooqatigiinnik pilersitsinikkut qulakkearniarneqassasoq, taamatullu isumaqarnerput aalajangiusimavarput.

Taamaattorli ATASSUT-mit ilisimalluinnarparput mianersorfissaqartoq, tassa avataaniit siunnersortit qanoq atorneqarnissaat aammalu taakkununga ilisimatitsissutigineqartartussat pillugu aalajangersimasumik isumaqatigiissuteqartoqartariaqartoq.

Niuernikkummi mianerineqartariaqartut isertuunneqartariaqartullu innersuussutigalugit qinnuteqartut qinnuteqarnissaminnillu eqqarsateqartut ataasiakkaat pillugit paasissutissat mianernartut sumut tamaanga siammarterneqannginnissaat soorunami qulakkearniagassaammat pingaaruteqarluinnartoq.

ATASSUT-mit isumaqarpugut Naalakkersuisut nassuiaasiortinneqarnissaannik siunnersuuteqartut kissaateqarnerat naapertorneqartariaqartoq, matumani aamma kissaatigisagut ilanngullugit, taamaammallu naatsukullammik taamatut oqaaseqaateqarluta inassutigissavarput siunnersuut akuersaartumik suliarineqassasoq aappassaaneernejartinnagulu Aatsitassanut Ataatsimiititaliamut suliassanngortinneqassasoq.